

## Samþykktir STEFs

### 1. Nafn og aðsetur

- 1.1 Samtökin heita Samband tónskálda og eigenda flutningsréttar, skammstafað STEF.
- 1.2 Heimili og varnarþing samtakanna er í Reykjavík.

### 2. Tilgangur og viðfangsefni

- 2.1 STEF eru höfundaréttarsamtök, sem gæta höfundaréttarlegra hagsmuna innlendra og erlendra tónskálda, textahöfunda, svo og annarra réthafa tónverka og tilheyrandi texta. Samtökin starfa einungis í umboði umbjóðenda sinna og veita þeim fyrirgreiðslu, en safna ekki eignum í eigin þágu. Samtökin hafa viðurkenningu menntamálaráðuneytisins til innheimtu höfundaréttargjalda samkvæmt höfundalögum.
- 2.2 Höfuðviðfangsefni STEFs í samræmi við tilgang sinn samkvæmt grein 2.1 eru þessi:
  - A) Samtökin stuðla að og beita sér fyrir varðveislu og eflingu hins einstaklingsbundna höfundaréttar með stöðugri varðgæslu á þessu sviði, beita sér fyrir nýjungum á sviði höfundalöggjafar og standa vörð um tilvist réttarins með öllum tiltækum ráðum.
  - B) Samtökin veita tónflutningsleyfi, innheimta gjöld fyrir leyfin og framkvæma hvaðeina, sem að því lýtur, þ. á m. málshöfðun til gæslu og verndar hagsmunum þessum. Leita samtökin og gera í því sambandi samninga við útvarpsstöðvar og aðra þá aðila sem tónlist flytja. Samtökin geta sett gjaldskrár fyrir opinberan flutning tónlistar og eru þær háðar staðfestingu menntamálaráðuneytisins.
  - C) Samtökin veita leyfi til fjölföldunar tónlistar, innheimta gjöld fyrir leyfin og framkvæma hvaðeina, sem að því lýtur, þ. á m. málshöfðun til gæslu og verndar hagsmunum þessum. Samtökin geta falið norrænu innheimtustofnuninni á sviði fjölföldunarrettar, Nordisk Copyright Bureau, að gæta þessara hagsmuna í umboði sínu.

- 2.3 STEF á aðild að FJÖLÍS, IHM og öðrum þeim samtökum, sem stofnsett kunna að verða, til þess að innheimta höfundaréttargjöld og önnur sambærileg gjöld samkvæmt höfundalögum eða öðrum lögum.
- 2.4 STEF annast samskipti við hliðstæð samtök erlendra réttihafa.

### 3. Aðild

- 3.1 Aðild að STEFi eiga þeir sem hafa veitt samtökunum umboð til hagsmunagæslu og innheimtu höfundaréttargreiðslna.
- 3.2 Aðildarfélög STEFs eru: Tónskáldafélag Íslands og Félag tónskálda og textahöfundar. Hlutverk félaganna er m.a. að gæta hagsmuna tónskálda og annarra réttihafa tónverka og tilheyrandi texta í samstarfi við STEF.
- 3.3 Þeir einir geta verið félagsmenn í aðildarfélögum STEFs, sem eru virkir tónhöfundar (tónskáld og/eða textahöfundar) eða erfingjar þeirra, er áður hafa verið félagsmenn í hlutaðeigandi félagi, eftir því sem nánar er kveðið á um í samþykktum félaganna. Skilyrði er að allir félagsmenn í hvoru félagi um sig hafi veitt STEFi umboð sitt. Skulu ákvæði þar að lútandi vera í samþykktum félaganna og stjórnir þeirra sjá um að þeim sé framfylgt. Í engu atriði mega samþykktir aðildarfélaganna brjóta í bága við samþykktir STEFs.
- 3.4 Auk aðildarfélaganna eiga þeir réttihafar, sem standa utan þeirra, aðild að stjórn og fulltrúaráði samkvæmt greinum 4 og 5.

### 4. Stjórn og framkvæmdarstjóri

- 4.1 Stjórn samtakanna skipa sjö menn úr hópi fulltrúaráðs. Formenn aðildarféлага STEFs eru skipaðir án kjörs í stjórnina. Fimm stjórnarmenn eru síðan kosnir á aðalfundi fulltrúaráðs STEFs til tveggja ára í senn. Skal einn hið minnsta koma úr hvoru aðildarfélagi fyrir sig og eigi færri en einn vera utan þessara féлага. Eftir kjör aðalmanna skal á aðalfundi fulltrúaráðsins hver aðalmaður tilnefna sinn varamann úr hópi fulltrúaráðsins. .
- 4.2 Stjórnin kýs sér formann og varaformann til tveggja ára í senn. Skulu þeir ekki vera í sama aðildarfélagi (eða þá annar þeirra að vera utan aðildarféлага).
- 4.3 Þeir einir geta setið stjórn STEFs sem aðalmenn og varamenn er uppfylla skilyrði til kjörgengis í fulltrúaráð samtakanna samkvæmt grein 5.3.

- 4.4 Þriggja manna kjörstjórn, sem stjórn STEFs skipar skal annast framkvæmd kjörs bæði í fulltrúaráð og stjórn og skera úr öllum ágreinings- og vafaatriðum í sambandi við þessar kosningar.
- 4.5 Áður en kosningin fer fram skal leitað eftir framboðum til stjórnarkjörs. Skal slíkt gert með því að kjörstjórn sendir tilkynningu til kjörinna fulltrúarráðsmanna. Skulu þeir tilkynna um framboð sín með a.m.k. viku fyrirvara. Það sama á við um þá sem gefa kost á sér í varastjórn. Í tilkynningunni skulu fylgja upplýsingar um hvort einhverjir hagsmunaárekstrar kunni að vera á milli hagsmuna viðkomandi einstaklings og STEFs, þ.m.t. hvort viðkomandi skuldi samtökunum einhverja fjármuni. Þá skal frambjóðandi til taka allar þær greiðslur sem viðkomandi hefur þegið frá samtökunum sl. ár, þ.m.t. höfundaréttargreiðslur, styrki, stjórnarlaun svo og önnur hlunnindi. Heimilt er að tilgreina eingöngu hvað varðar höfundaréttargreiðslur í hvaða flokki tekjur þeirra eru, sbr. flokka hér að neðan:
- a) Tekjur upp í 500 þúsund kr.
  - b) Tekjur frá 500.000 kr. til 1 milljónar kr.
  - c) Tekjur frá 1 milljón kr til 3 milljóna kr.
  - d) Tekjur hærri en 3 milljónir kr.

Kjörstjórn skal áframsenda tilkynningar þessar til kjörinna fulltrúarráðsmanna, þannig að þeim gefist kostur á að kynna sér þær fyrir stjórnarkjör.

Stjórnarmenn skulu gæta þess að senda einnig sambærilegar tilkynningar áður en aðalfundur fulltrúaráðs er haldinn þegar síðara ár þeirra sem stjórnarmenn hefist.

- 4.6 Bjóði fimm sig fram í stjórn teljast þeir sjálfkjörnir, enda sé skilyrðum gr. 4.1. fullnægt. Að öðrum kosti fer fram leynileg kosning, þar sem hverjum fulltrúa skal afhentur einn kjörseðill með nöfnum frambjóðenda. Skal hann merkja við eitt til fimm nöfn á kjörseðlinum. Ef brugðið er út af fyrrgreindum fyrirmælum telst kjörseðill ógildur, nema hann sé auður. Ef tveir eða fleiri fá jafn mörg atkvæði skal hlutað um það hvor eða hver þeirra telst rétt kjörinn í stjórn STEFs.
- 4.7 Stjórnin stýrir starfsemi samtakanna í samræmi við ákvarðanir fulltrúaráðs samkvæmt grein 5.11. Stjórnin skal annast um að skipulag samtakanna og starfsemi sé jafnan í réttu og góðu horfi. Stjórnarfundur skal boða skriflega með viku fyrirvara þegar formaður ákveður eða þrír stjórnarmanna óska þess. Heimilt er þó að boða til fundar með styttri fyrirvara af sérstöku tilefni sé slíkt nauðsynlegt. Skal þá næsti stjórnarfundur staðfesta þær ákvarðanir sem á slíkum fundi voru teknar. Fundargerð skal rituð á stjórnarfundum.
- 4.8 Stjórnarfundur er lögmætur ef meirihluti stjórnar er mættur. Afl atkvæða ræður á stjórnarfundum.
- 4.9 Stjórn skal taka ákvörðun innan þess ramma sem fulltrúaráð setur um eftirfarandi:

- a) Frádrátt af höfundaréttartekjum meðlima, þ.m.t. frádrátt vegna Menningarsjóðs.
  - b) Ákvöxtun fjármuna og hvernig fjármagnstekjum skuli ráðstafað.
  - c) Hvernig ráðstafað skuli fjármunum vegna verka sem ekki finnast höfundur að.
  - d) Áhættustýringu.
  - e) Sölu eða leigu eigna
  - f) Samruna við önnur samtök eða fyrirtæki.
  - g) Stofnun dótturfélaga, útibúa, deilda eða samrekstrar (joint venture)
  - h) Lánagerninga og veðsetninga.
  - i) Kaup á hlutabréfum eða öðrum fjárfestingum.
- 4.10 Stjórn skal útbúa og birta gegnsæisskýrslu árlega samkvæmt ákvæðum höfundalaga.
- 4.11 Stjórn skal setja sér verklagsreglur, sem kveður m.a. á um helstu verkefni stjórnar, gegnsæi, aðgang að upplýsingum, styrkveitingar og verkefni stjórnarformanns.
- 4.12 Ef ljóst er að aðalmaður í stjórn getur ekki sinnt skyldum sínum um lengri tíma eða segi hann af sér stjórnarmennsku áður en kjörtímabili hans lýkur, tekur varamaður sæti hans fram að næstu kosningum. Þess skal gætt ef hægt er, að viðkomandi varamaður sé frá sama aðildarfélagi og aðalmaðurinn eða utan félaga sé um slíkt að ræða.
- 4.13 Stjórn STEFs ræður framkvæmdastjóra samtakanna, en framkvæmdastjóri ræður annað starfsfólk þeirra. Forstöðumaður rekstrarsviðs skal ráðinn í samráði við stjórn. Framkvæmdastjóri stýrir daglegum rekstri samtakanna í samræmi við ákvarðanir stjórnar og fulltrúaráðs samtakanna. Telji framkvæmdastjóri að einhver ákvörðun stjórnar eða fulltrúaráðs brjóti í bága við lög eða reglur þær, sem samtökin skulu starfa eftir, getur hann neitað að framkvæma þá ákvörðun. Framkvæmdastjóri getur skotið slíkum ákvörðunum stjórnar til fulltrúaráðs. Framkvæmdastjóri hefur rétt og skyldu til fundarsetu á stjórnarfundum og fulltrúaráðsfundum og hefur þar málfrelsi og tillögurétt.
- 4.14 Framkvæmdastjóri skal árlega upplýsa kjörna fulltrúa um hvort einhverjir hugsanlegir hagsmunaárekstrar séu á milli hans og samtakanna, hvort hann sé í skuld við samtökin og hvort og þá hversu miklar höfundaréttartekjur eða styrki hann hafi þegið frá samtökunum á sl. ári.
- 4.15 Undirskrift fjögurra stjórnarmanna er nægileg til þess að skuldbinda samtökin.

## 5. Fulltrúaráð

- 5.1 Fulltrúaráð STEFs er skipað 21 fulltrúa. Fulltrúar skulu allir vera virkir höfundar.

5.2 Formenn aðildarfélaga STEFs eru skipaðir án kjörs í fulltrúaráð STEFs. Aðrir meðlimir fulltrúaráðs skulu kjörnir til tveggja ára í senn í almennri atkvæðagreiðslu sem fer fram í marsmánuði annað hvert ár. Skulu fimm kjörnir fulltrúar hið minnsta koma úr hópi rétthafa utan félaga og eigi færri en fimm úr hvoru aðildarfélagi fyrir sig.

**Commented [GBB1]:** Fulltrúar Tónskáldafélags Íslands setja fyrirvara við þessa breytingu og vilja ræða hana betur á fulltrúaráðsfundi.

5.3 Atkvæðisrétt hafa allir þeir rétthafar, sem veitt hafa STEFi umboð sitt til hagsmunagæsluhvort sem þeir eru félagar í öðru hvoru aðildarfélagi þess eða standa utan félaganna, enda hafi þeir fengið úthlutað að lágmarki frá samtökunum samtals 125 þúsund kr. á undangengnum þremur árum. Höfundur eða annar rétthafi fer sjálfur með atkvæðisrétt vegna réttinda sinna, jafnvel þótt hann hafi framselt rétt sinn til viðtöku höfundalauna til annars aðila, nema um sé að ræða viðurkenndan tónlistarforleggjara. Ef höfundur eða rétthafi er látinn skal sá erfingi hans eða annar fyrrisvarmaður erfingja, sem skráður er viðtakandi greiðslna samkvæmt rétthafaskrá STEFs, fara með óskiptan atkvæðisrétt vegna réttinda hins látna.

5.4 Eigi síðar en 1. febrúar á kosningarári skal auglýst eftir framboðum og skal framboðsfrestur vera fjórar vikur. Ef nítján hafa boðið sig fram sem fullnægja skilyrðum 5.2 gr. og 5.10 gr. að framboðsfresti loknum, teljast þeir sjálfkjörnir, en hafi fleiri boðið sig fram skal atkvæðagreiðsla fara fram samkvæmt grein 5.6 og 5.7. Ef færri en nítján hafa boðið sig fram, að venjulegum framboðsfresti loknum, skal hann framlengdur um eina viku.

5.5 Framboð í fulltrúaráð skal vera skriflegt og senda kjörstjórn.

5.6 Rétthafar fara með atkvæði eins og hér greinir:

- Sérhver rétthafi sem á annað borð hefur atkvæðisrétt fer fyrir þremur atkvæðum.
- Fari samanlagðar höfundaréttargreiðslur, sem rétthafinn hefur fengið úthlutað á undangengnum þremur árum, fram úr 350 þús. kr. fer viðkomandi með sex atkvæði.
- Fari greiðslurnar fram úr 745 þús. kr. fer viðkomandi rétthafi með níu atkvæði,
- Fari greiðslurnar fram úr 1,33 millj. kr. fer viðkomandi rétthafi með tólf atkvæði.
- Fari greiðslurnar fram úr 2,5 millj. kr. Fer hann með fimmtán atkvæði.

Samkvæmt þessu getur enginn einn rétthafi farið með fleiri en fimmtán atkvæði við atkvæðagreiðsluna. Hver rétthafi getur greitt einum eða fleiri frambjóðendum atkvæði.<sup>1</sup>

5.7 Atkvæðagreiðslan fer þannig fram að hver rétthafi, sem atkvæðisrétt hefur, fær senda jafn marga kjörseðla og þau atkvæði eru sem hann ræður yfir. Á kjörseðlinum skulu skráð nöfn frambjóðenda í stafrófsröð og skal rétthafinn krossa

<sup>1</sup> Fjöldi rétthafa með fimmtán atkvæði er samkvæmt þessu fimmtungur þeirra sem þrjú atkvæði hafa, fjöldi rétthafa með tólf atkvæði er fjórðungur miðað við sama hóp og þannig áfram: Níu atkvæði hefur þriðjungur af fjölda viðmiðunarhópsins og sex hefur helmingur.

við nafn eins þeirra. Að því loknu setur hann kjörseðilinn í lokað umslag. Umslöginn með kjörseðlunum skulu berast skrifstofu STEFs innan þriggja vikna frá því að þau voru send út. Annast kjörstjórn talningu atkvæða. Berist kjörseðill frá einhverjum, sem ekki hefur atkvæðisrétt, sé hann annars konar en þeir kjörseðlar, sem sendir voru út, sé merkt við nöfn fleiri en eins frambjóðanda á kjörseðli eða sé þar að finna einhver auðkenni, sem bent gætu til þess hver kjósandinn er, telst seðillinn ógildur, nema hann sé auður. Ef tveir eða fleiri fá jafn mörg atkvæði skal hlutað um það hvor eða hver þeirra telst rétt kjörinn í fulltrúaráð STEFs. Ávallt skal þó séð til þess að a.m.k. þrír úr hópi hinna sjö fulltrúakomi úr hópi réttthafa utan aðildarfélaganna.

- 5.8 Auk atkvæðagreiðslu skv. grein 5.7. skal þeim sem þess óska vera gert mögulegt að greiða atkvæði á rafrænan hátt. Skal stjórn ákveða nánar hvernig slík kosning skuli framkvæmd.
- 5.9 Þegar úrslit atkvæðagreiðslunnar liggja fyrir skulu þeir, er kjörnir hafa verið í fulltrúaráðið sem aðalmenn, tilnefna varamenn sína og skulu varamenn fullnægja skilyrðum til að eiga sæti í fulltrúaráðinu samkvæmt grein 5.10. auk þess sem varamenn fulltrúa utan féлага skulu einnig standa utan aðildarféлага STEFs.
- 5.10 Þeir einir geta átt sæti í fulltrúaráðinu og eru kjörgengir til þess sem fullnægja skilyrðum til að greiða atkvæði og fara með atkvæðisrétt samkvæmt grein 5.3. Réttthafar sem verulegra hagsmuna hafa að gæta sem viðsemjendur STEFs um höfundaréttargjöld eru heldur ekki kjörgengir í fulltrúaráðið né heldur þeir sem uppvísir hafa orðið að stórfelldum höfundaréttarbrotum eða brotið hafa gegn samtökunum með öðrum hætti.
- 5.11 Fulltrúaráðið fer með æðsta vald í málefnum samtakanna og kemur aðalfundur þess í stað almenns aðalfundar félagsmanna
- 5.12 Stjórn skal þó sjá til þess að opinn félagsfundur verði haldinn eigi sjaldnar en árlega þar sem kynnt er ársskýrsla og ársreikningur samtakanna og unnt er að koma á framfæri ábendingum til stjórnar.
- 5.13 Aðalfundur fulltrúaráðsins skal halda í maímánuði ár hvert og skal taka fyrir þessi mál á fundinum:
  1. Skýrslu stjórnar og framkvæmdastjóra fyrir liðið ár.
  2. Afgreiðslu endurskoðaðra reikninga samtakanna fyrir liðið ár.
  3. Tilkynningu um kosningu stjórnar fyrir næsta starfsár, sbr. þó 4. tölul.
  4. Kosningu fimm manna í stjórn STEFs, þó aðeins annað hvert ár, sbr. kafla 4.
  5. Kosningu tveggja skoðunarmanna og tveggja til vara fyrir næsta starfsár. Skal annar skoðunarmanna vera félagsmaður í Tónskáldafélagi Íslands, en hinn í Félagi tónskálda og textahöfunda.
  6. Kosningu formanns fulltrúaráðsins. Formaður fulltrúaráðs skal ekki samhliða sitja í stjórn samtakanna.

7. Ákveða laun stjórnarmanna og önnur hlunnindi þeirra ef slíku er til að dreifa svo og laun skoðunarmanna og formanns fulltrúaráðs.
8. Önnur mál.

Fulltrúaráð skal ennfremur:

- a) Setja ramma um frádrátt frá höfundaréttartekjum og hugsanlegum öðrum tekjum STEFs s.s. fjármagnstekjum.
  - b) Ákveða ávöxtunarstefnu.
  - c) Setja ramma um ráðstöfun fjármuna vegna verka sem ekki finnst höfundur að.
  - d) Setja úthlutunarreglur.
- 5.14 Aðra fulltrúaráðsfundi en aðalfund skal boða þegar stjórn ákveður eða skoðunarmenn eða fimm fulltrúar óska þess.
- 5.15 Stjórn STEFs skal boða til fulltrúaráðsfunda skriflega og skal geta dagskrár í fundarboði. Aðalfund skal boða með tveggja vikna fyrirvara, en aðra fundi með einnar viku fyrirvara.
- 5.16 Fulltrúar geta óskað eftir því að tiltekin mál séu sett á dagskrá aðalfundar fulltrúaráðs og skulu slíkar óskir berast eigi síðar en þann 1. apríl ár hvert vegna aðalfundar þess árs.
- 5.17 Kjörnir fulltrúar skulu sjálfir bera ábyrgð á því að boða varamenn sína á fundi fulltrúaráðsins geti þeir ekki sótt fund. Komist varamaður ekki á fundinn er fulltrúa heimilt að veita öðrum fulltrúa umboð sitt til að sækja viðkomandi fund. Getur hver og einn fulltrúi einungis farið með umboð fyrir einn annan fulltrúa. Umboð telst einungis gilt ef notað er form frá samtökunum.
- 5.18 Formaður fulltrúaráðsins stjórnar fundum þess. Rituð skal fundargerð. Ekki verður ályktað um mál, sem ekki er getið í fundarboði, nema 4/5 hluta fundarmanna samþykki. Afl atkvæða ræður á fulltrúaráðsfundum nema annað sé sérstaklega tekið fram í samþykktum þessum.

## 6. Meðferð fjármála

- 6.1 Tekjum STEFs skal varið sem hér segir:
- A) Af heildartekjum skal fyrst greiða opinber gjöld, ef á verða lögð, og síðan allan rekstrarkostnað samtakanna.
  - B) Af því fé, sem þá verður eftir, skal af innlendum tekjum greiða allt að 10% til Menningarsjóðs STEFs, eftir nánari ákvörðun aðalfundar fulltrúaráðs samtakanna. Úr þeim sjóði er heimilt samkvæmt ákvörðun aðalfundar fulltrúaráðs á ári hverju að úthluta fé til starfsemi aðildarfélaga STEFs. Skulu félögin eiga jafnan rétt til úthlutunar enda sé fjármununum varið til

sambærilegrar starfsemi. Öll ráðstöfun fjár úr Menningarsjóði skal vera gegnsæ og tilgreind í ársreikningi samtakanna. Skulu aðildarfélögin einnig gera sérstaka grein fyrir ráðstöfun úthlutaðs fjár.

- C) Það fé, sem þá verður eftir, skiptist með þeim, er flutningsrétt eiga á verkum sem samtökin innheimta gjöld fyrir, eftir þeim reglum sem settar verða af samtökunum í samræmi við reglur hliðstæðra samtaka í aðildarríkjum Bernarsáttmálans. Í reglunum má af hagkvæmnisástæðum kveða á um einföldun úthlutunar til innlendra og erlendra rétthafa í samræmi við hefðir sem skipast hafa í því efni.
- 6.2 Athugasemdir við úthlutun höfundaréttargreiðslna frá STEFi ber að senda skrifstofu samtakanna innan þriggja mánaða frá því að tilkynning um úthlutun var send rétthafa, enda er samtökunum ekki skylt að taka til greina athugasemdir við afreikning, þær er síðar koma fram.
- 6.3 Reikningsár STEFs er almanaksárið.
- 6.4 Ársreikningur STEFs skal endurskoðaður ár hvert af löggiltum endurskoðanda og sendur kjörnum skoðunarmönnum samtakanna, en þeir skulu aftur senda ársreikninginn til stjórnar STEFs með athugasemdum sínum. Skal reikningurinn síðan, ásamt öðrum reikningum samtakanna, lagður fyrir aðalfund fulltrúaráðs þeirra til samþykktar. Þeir fulltrúar, sem þess óska, geta fengið athent eintak af ársreikningum daginn fyrir aðalfund.
- 6.5 Samþykktur ársreikningur STEFs, skal vera aðgengilegur á heimasíðu samtakanna.
- 6.6 Styrkir úr sjóðum, sem tengjast STEFi, þ. á m. á grundvelli samninga samtakanna við aðra aðila, skulu veittir eftir eðli verkefna í samræmi við markmið þeirra, óháð félagsaðild styrkþega. Styrkirnir skulu veittir á faglegum forsendum.

## **7. Umboð og meðferð kvartana**

- 7.1 Með undirritun umboðs til STEFs felur viðkomandi höfundur eða rétthafi STEFi til að gæta hagsmuna sinna og innheimta höfundaréttargreiðslur eins og þar er nánar kveðið á um. Jafnframt skuldbindur viðkomandi meðlimur STEFs sig til að fylgja samþykktum STEFs og úthlutunarreglum eins og þær eru á hverjum tíma.
- 7.2 Umboð til STEFs skal tilgreina hvaða réttindaflokkar og landsvæði viðkomandi meðlimur framselur umsjón með til STEFs. Skal stjórn STEFs ákveða réttindaflokkana með tilliti til þess hvað gerlegt er að framkvæma á hagkvæman hátt á hverjum tíma. Upplýsingar um réttindaflokka skulu birtar á heimasíðu STEFs. Stjórninni er heimilt að ákveða að þeir meðlimir sem kjósa að velja ekki alla réttindaflokkana greiði herra umsýslugjald til STEFs en aðrir og skal það þá



innheimt sem árlegt gjald. Taki stjórn ákvörðun um breytingar á réttindaflokkum, er litið svo á að allir meðlimir séu bundnir af viðkomandi breytingum.

- 7.3 Meðlimur samtakanna getur sagt sig úr þeim (eða frá einstökum flokkum réttinda skv. gr. 7.2) með skriflegri tilkynningu þar að lútandi. Uppsögnin tekur gildi við lok þess reikningsárs sem lýkur a.m.k. sex mánuðum eftir að uppsögnin berst samtökunum.
- 7.4 Meðlimir STEFs hafa heimild þrátt fyrir umboð það sem þeir hafa veitt STEFi, veitt sjálfir leyfi fyrir notkun verka sinna þegar um er að ræða notkun sem ekki er í hagnaðarskyni. Slík leyfi gilda einungis um tiltekin verk og tiltekna notkun og skal viðkomandi meðlimur tilkynna STEFi um viðkomandi leyfisveitingu a.m.k. með 10 daga fyrirvara. Notkun telst einungis vera ekki í hagnaðarskyni ef um er að ræða söfnun til tiltekinna góðgerðarmála eða fræðslustarfsemi og þegar fyrir liggur að aðrir aðilar sem einnig koma að viðkomandi notkun gefi einnig vinnu sína. Þá skal vera tryggt að samþykki allra meðhöfunda að verkinu sé fyrir hendi.
- 7.5 Stjórn STEFs hefur heimild til að víkja meðlimi úr samtökunum ef stjórnin telur meðlim hafa brotið ákvæði samþykkt STEFs eða á annan hátt sýnt af sér háttsemi sem er til þess fallin að vinna gegn hagsmunum og starfsemi STEFs. Viðkomandi meðlimur getur við slíkt óskað eftir því að endanleg ákvörðun verði tekin af fulltrúaráði STEFs á næsta aðalfundi þess. Hafi meðlimi verið vikið úr samtökunum tekur slíkt gildi við lok reikningsárs sem skal þó vera a.m.k. sex mánuðum eftir að ákvörðun var tekin.
- 7.6 STEF skal svara skriflega kvörtunum meðlima. Sé viðkomandi ósáttur við afgreiðslu erindis til samtakanna getur hann vísað málinu til þriggja manna úrskurðarnefndar sem skipuð skal af stjórn.

## **8. Breytingar á samþykktum**

- 8.1 Samþykktum þessum, reglum STEFs um úthlutun höfundaréttargreiðslna sem og stjórnarfyrikomulagi og markmiðum sjóða samkvæmt grein 6.6 verður aðeins breytt á aðalfundi fulltrúaráðsins, þar sem a.m.k. helmingur fulltrúa er mættur og 3/4 hlutar þeirra greiða breytingunni atkvæði. Nú hlýtur tillaga til breytinga á samþykktunum 2/3 hluta greiddra atkvæða á aðalfundi og verður samþykktunum þá breytt ef sama tillaga er samþykkt á aðalfundi að ári að öllu leyti óbreytt með 2/3 hluta greiddra atkvæða. Að öðrum kosti telst tillagan felld. Breyting á samþykktum skal taka gildi um leið og hún hefur verið samþykkt skv. ofangreindu.
- 8.2 STEF verður því aðeins lagt niður að um það sé gerð samþykkt á fundi í fulltrúaráði STEFs eftir þeim reglum sem greindar eru í grein 8.1. Skal þá sá fundur ráðstafa

eignum samtakanna og gera aðrar nauðsynlegar ráðstafanir er að slitum þeirra lúta. Skulu eignir samtakanna renna til sérstaks menningarsjóðs til stuðnings íslenskrar tónlistar sem þá verði settur á stofn sé slíkur sjóður þá ekki til er fundurinn telur fullnægja ofangreindu skilyrði.

### 8.3 Samþykktir þessar öðlast nú þegar gildi

Samþykkt á aðalfundi STEFs 16. maí 2009, með breytingum frá aðalfundi STEFs [dagsetning].